



Narodni heroj JANKO GREĐELJ

Drug JANKO GREĐELJ rođen je 28. IV 1916. u Zagrebu.

Kao dijete radničke porodice, koja je živjela od nesigurne i male zarade, Janko je završio 4 razreda građanske škole, i ne mogavši dalje u višu školu, otišao je u Željezničku radionicu u Zagrebu na izučavanje kovino-tokarskog zanata, gdje je završio 4 razreda Željezničke zanatske škole i postao kvalificirani radnik.

Mladi Janko se već kao učenik Zanatske škole povezao sa naprednim i revolucionarnim radničkim pokretom i bio veoma cijenjen od omladinaca kao iskren, dobar i povjerljiv drug i aktivista. U znak povjerenja

i priznanja primljen je 1937. godine za člana SKOJ-a, a početkom 1938. godine postao je članom Komunističke partije. Svoje organizatorske i propagandne sposobnosti i veoma aktivan rad među radničkom omladinom po zadatku Partije ispoljio je najprije u omladinskom kulturno-prosvjetnom društvu »Mladost« u Trnju, koje je bilo osnovano na inicijativu Rajonskog komiteta SKOJ-a željezničara, a kasnije svestrano i aktivno djelovao je u radničkom planinarskom društvu »Priatelji prirode«. Sve zadatke koje je Partija postavljala pred njega izvršavao je sa rijetkom savjesnošću, požrtvovnošću i hrabrošću, imajući uvijek pred očima visoke ideale radničke klase i komunizma.

Za vrijeme građanskog rata u Španiji drug Janko je pokazao veliku aktivnost u sakupljanju priloga za pomoć španjolskim republikanskim borcima, kao i u svim ilegalnim akcijama, koje je Partija u to doba organizirala.

Premda mlad, on je kao sposoban organizator revolucionarnog rada i inicijativan aktivista 1939. godine postao član rukovodstva KP za željeznicu i tu je bio sve do svoje smrti. Kao članu rukovodstva povjeren mu je teški i odgovorni zadatak organiziranja udarnih antifašističkih grupa na željeznici, a napose u Željezničkoj radionici, gdje je bio neposredni komandant i rukovodilac. Ovaj zadatak drug Gredelj je izvršio sa velikom neustrašivošću, ostavši svim borbenim saradnicima u najljepšoj uspomeni po drugarstvu, hrabrosti i predanosti u radu.

Pred sam rat i napad fašističkih okupatora na našu zemlju drug Janko je dobio još jedan važan i povjerljiv zadatak: služio je kao veza CK Partije sa partijskim organizacijama u Varaždinu, Slav. Brodu, Osijeku, Gospiću i drugim mjestima, a kad je došlo do okupacije zemlje, njegove udarne grupe dobile su zadatak za uništavanje ustaških agenata, izdajnika i glavešina, kao i Nijemaca.

Tako je drug Janko Gredelj aktivno učestvovao u napadu na »Gestapovce« na Bukovačkoj cesti, a krajem juna 1941. godine sudjelovao je u akciji na Zapadnom kolodvoru u Zagrebu, kad je sa grupom članova Partije provalio u vagon sa municijom i odnio 60 pušaka, 5 puškomitraljeza, 10.000 metaka i nekoliko ručnih bombi.

Ljeti 1941. godine drug Janko je bio uhapšen od ustaša i kroz razne torture i mučenja ispitivan. Pošto ni pod najvećim mukama ustaše nisu uspjele od Janka dobiti priznanje, on je radi pomanjkanja dokaza pušten

na slobodu. Ali kratko vrijeme iza toga, saznavši za pripremu novih hapšenja, Janko je po direktivi Partije napustio zaposlenje u Željezničkoj radionici i prešao u ilegalnost. Otada je sa još većom smjelošću organizatora i revolucionera izvršavao sve postavljene zadatke, prenosio partijsku štampu, pribavljao i dostavljao oružje udarnim grupama i dalje radio na njihovom jačanju i proširenju za borbu protiv okupatora.

Početak jeseni 1941. godine prebačen je na rad u »Tehniku« CK KPH, vršio razne povjerljive dužnosti sve do 23. XII iste godine, kad je još sa dvojicom drugova, od kojih je jedan bio drug Engel Ilija, iznenađen od ustaških agenata u Klaićevoj ulici broj 17. i u borbi koja se tom prilikom razvila između njega i ustaša, pao teško ranjen. Ustaše su Janka odveli u Vinogradsku bolnicu, gdje ga je jedan od njih teško mrcvario i čizmama dotukao.

Tako je drug Janko Gredelj poginuo herojskom smrću u najvećim mukama 23. XII 1941. godine.